



Broj: 02-04-2593/22-AP-4
Datum: 25.10.2022. godine

GRADSKO VIJEĆE ZAVIDOVIĆI
n/r PREDSDJEDAVAJUĆOJ GRADSKOG VIJEĆA
mr. iur. Erna Merdić Smailhodžić

PREDMET: Odgovori na vijećnička pitanja sa 5. sjednice Gradskog
vijeća Zavidovići održane 12.09.2022. godine, dostavljaju se

Povodom vijećničkih pitanja postavljenih na 5. sjednici Gradskog vijeća Zavidovići
održanoj 12.09.2022. godine, dostavljamo odgovore na iste kako slijedi:

1. VIJEĆNIČKO PITANJE VIJEĆNIKA HARISA HODŽIĆ

Vijećnik Haris Hodžić: Na osnovu članova 8. i 87. Poslovnika o radu Općinskog vijeća Zavidovići, kao vijećnik Gradskog vijeća Zavidovići postavljam sljedeće vijećničko pitanje: Tražim od nadležne službe da nam dostavi informacije gdje je utrošeno 86.147,00 KM po osnovu ugovora br. 1374-1-3-41-5-55/22 za redovno održavanje lokalnih cesta za 2022. godinu, te postupak kako se vršilo održavanje, koje ceste su održavane, koje radnje na održavanju su odrađene i da li je održavanje vršeno na zahtjev mjesnih zajednica, ako jeste dostaviti u prilogu kopije zahtjeva MZ, ili na neki drugi način-dostaviti informaciju?

Od nadležnih zahtjevam jasne odgovore u pisanoj formi.

Vijećničko pitanje upućuje se nadležnoj općinskoj službi.

S poštovanjem,

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-10-206/22 od 10.10.2022. godine): U okviru redovnog održavanja lokalnih cesta za 2022. godinu izvršene su sljedeće sanacije:

- Lokalna cesta Hajderovići – Mujkići: Asfaltiranje sa neophodnim pregradnjama u dužini cca 150,0 metara u vrijednosti 22.992,26 KM,
- Lokalna cesta Gostović – Žioke – Mahoje: Asfaltiranje sa neophodnim pregradnjama u dužini od cca 140,00 metara u vrijednosti 22.880,00 KM,
- Lokalna cesta Zavidovići - Paravci (sječenje granja i šiblja, čišćenje kanala i propusta, sanacija udarnih rupa...) u vrijednosti 5.964,00 KM,
- Lokalna cest Zavidovići - Biljačić (sanacija deformacija kolovoza i prilaza) u vrijednosti 1.242,50 KM,

- Lokalna cesta Mramorje - Mednjik: Asfaltiranje sa neophodnim predradnjama u dužini od cca 110 m u vrijednosti 22.595,63 KM.

Ukupna vrijednost izvedenih radova iznosi 75.674,39 KM, dok iznos od 10.472,61 KM još uvijek nije utrošen i služi kao svojevrsna rezerva do kraja godine.

Grad Zavidovići je upravitelj lokalnih cesta a tu funkciju obavlja putem nadležne stručne službe. Prioriteti redovnog održavanja lokalnih cesta se ne raspoređuju unutar mjesnih zajednica u smislu dijeljena iznosa prema istima već na nivou cjelokupne mreže lokanih cesta i raspoloživih budžetskih sredstava.

Kako bi svakoj iole većoj mjesnoj zajednici cjelokupni godišnji iznos od 86.000,00 KM bio nedovoljan u smislu potreba za redovnim održavanjem lokalnih cesta, stručna služba na osnovu stanja pojedine lokalne ceste i raspoloživosti sredstava predlaže prioritete redovnog održavanja.

Također, kako se ne bi stekao utisak da mjesne zajednice nisu bitne, ovdje napominjemo da se na godišnjem nivou mjesne zajednice konsultuju prilikom izrade Plana kapitalnih investicija, te iste kandiduju svoje infrastrukturne projekte koji se u skladu sa planom i finansijskim mogućnostima realizuju.

2. VIJEĆNIČKA PITANJA VIJEĆNIKA SAMIRA SKEJIĆ

1. Vijećnik Samir Skejić: Pitanje broj 1.

Predmet: Vijećničko pitanje Gradonačelniku i Pomoćniku gradonačelnika u službi za upravu društvenih djelatnosti pitanja boraca i opću upravu.

Poštovani,

Zašto nije uvršten na 5 sjednicu Prijedlog odluke o pravima demobiliziranih branilaca grada Zavidovići. Nacrt odluke je usvojen i prošao javnu raspravu a prijedlog odluke nije donesen imajući u vidu činjenicu da na 5 sjednici vijeća nije uvršten kada će biti na kojoj sjednici.

Vijećničko pitanje postavljam u skladu sa odredbama 166. i 167. Poslovnika o radu općinskog vijeća Zavidovići.

Obzirom da je pitanje jasno kratko i precizno molim da mi Gradonačelnik ili pomoćnik da usmeni odgovor u skladu sa članom 168 i 169 Poslovnika o radu općinskog vijeća Zavidovići.

Odgovor na prvo vijećničko pitanje (Odgovor je sačinjen na osnovu akta Službe za upravu društvenih djelatnosti, pitanja boraca i opću upravu, broj: 04-45-19/22-AP-956 od 14.10.2022. godine): Prijedlog Odluke o pravima demobiliziranih branilaca Grada Zavidovići i članova njihovih porodica nije uvršten na 5. sjednicu Gradskog vijeća Grada Zavidovići zbog potrebe usaglašavanja odredaba, koje su predmet Odluke o pravima demobiliziranih branilaca Grada Zavidovići i članova njihovih porodica sa Kantonalnim i Federalnim propisima iz oblasti boračko-invalidske zaštite, sa propisima Zakona o upravnom postupku, te propisima kancelarijskog poslovanja i budžetskog poslovanja, zatim sa propisima o građenju, kao i usaglašavanja sa Odlukama Grada Zavidovići o visini naknada za pravo građenja, zatim sa stavovima pripadnika branilačkih populacija i procjeni njihovih potreba i usaglašavanja sa planom i mogućnostima budžeta Grada Zavidovići za finansiranje pojedinih prava iz Odluke.

Sve navedene aktivnosti i usklađivanja u procesu izrade Prijedloga Odluke, sa izvršenim izmjenama u odnosu na Nacrt Odluke iziskivale su i potrebu konsultacija sa Ministarstvom za boračka pitanja Zeničko-dobojskog kantona, te sa branilačkim udruženjima Grada Zavidovići, kao i sa Službom za upravu geodetskih, imovinskopravnih poslova i urbanizma, za koje aktivnosti je bilo potrebno i određeno vrijeme, a sve u svrhu osiguranja boljih prava i pogodnosti korisnika.

Prijedlog Odluke o pravima demobiliziranih branilaca Grada Zavidovići i članova njihovih porodica će biti uvršten na jednu od narednih sjednica Gradskog vijeća Grada Zavidovići.

2. Vijećnik Samir Skejić: Pitanje broj 2.

Obzirom da je aktuelna predizborna kampanja zamolio bih za etičko i pravno tumačenje Gradonačelnikove namjere i slobode da oficijelnu stranicu Grada zloupotrebljava u političke svrhe. Koliko smo upoznati oficijelni sajt Grada je u službi građana a nikako u službi određenih političkih subjekata i njihovih eksponenata. Zamoliću gradonačelnika da nam da neposredan odgovor ili gradskog opunomoćenika za ovakve situacije ili eventualno da nam tumačenje da pravobranilac ukoliko je ovo pitanje iz njegovog profesionalnog opsega. Molim odgovor u usmenoj formi.

Odgovor na drugo vijećničko pitanje (Odgovor je sačinjen od strane Stručne službe gradonačelnika): Stručna služba gradonačelnika je zadužena za postavljanje sadržaja na službenu web stranicu Grada Zavidovići. Iz pitanja nije jasno koji objavljeni sadržaj predstavlja po njegovom mišljenju zloupotrebu u političke svrhe učinjenu od strane Gradonačelnika kako bi dali odgovor na vijećničko pitanje. Cjelokupan sadržaj objavljen na službenoj web stranici Grada Zavidovići ima za cilj da informiše građane Grada Zavidovići o radu Gradonačelnika, gradskih službi, Gradskog vijeća Zavidovići, javnih ustanova, javnih preduzeća i drugih važnih informacija putem javnih objava. Sve navedeno prema našoj ocjeni ne može se podvesti pod zloupotrebu službene web stranice Grada Zavidovići u političke svrhe.

3. Vijećnik Samir Skejić: Pitanje broj 3.

Sljedeće pitanje je vezano za probleme integracije roma pa me zanima kakve rezultate je polučio Lokalni Akcioni plan za integraciju Roma na području Općine Zavidovići za period 2019.-2023.

Odgovor na treće vijećničko pitanje (Odgovor je sačinjen na osnovu akta Službe za upravu društvenih djelatnosti, pitanja boraca i opću upravu, broj: 04-45-15/22-AP-312 od 24.10.2022. godine): Kada je riječ o Akcionom planu za integraciju Roma na području općine Zavidovići, Služba od 2020. godine obezbjeđuje sredstva za učenike romske nacionalnosti koji pohađaju redovnu nastavu u osnovnim i srednjim školama na području Grada Zavidovići. U periodu od 2020. godine do 2022. godine sredstva sa Tekućeg transfera za realizaciju ciljeva iz LAP-a za Rome dodijeljena su za ukupno 146 djece / učenika, koji redovno pohađaju nastavu (učenici osnovnih i srednjih škola).

U navedenu svrhu utrošeno je:

- 2.400, 00 KM za 48 učenika romske nacionalnosti (2020. godine),
- 2.700, 00 KM za 41 učenika romske nacionalnosti (2021. godine),
- 3.600, 00 KM za 57 učenika romske nacionalnosti (2022. godine).

- Od 2020. godine, u okviru Projekta „PEACH“ („Predškolsko obrazovanje za svu djecu“ - inkluzija romske djece i djece iz socijalno-ranjivih porodica ruralnog područja općine), koji se realizovao u saradnji sa Karitasom Švicarske, Grad Zavidovići je putem JU „Gradski dječiji vrtić“ Zavidovići omogućio uključivanje u cjeloviti razvojni program za svu djecu romske nacionalnosti koja su bila prijavljena za navedeni Program, te je Općina u navedene svrhe od 2020. godine do 2022. godine izdvojila ukupno 65.000,00 KM.

- Kada je riječ o zdravstvenoj zaštiti, putem ove Služba svi redovni učenici, pa samim tim i djeca romske nacionalnosti koja redovno pohađaju nastavu, su zdravstveno osigurana. Prema našim saznanjima ne postoje djeca romske nacionalnosti koja nisu zdravstveno osigurana.

- Što se tiče zdravstvene zaštite odraslih Roma, među kojima je najveći broj radno-sposobnih osoba, njihov problem sa ostvarivanjem prava na zdravstvenu zaštitu nastaje zbog neblagovremene prve prijave ali i kasnijeg neredovnog javljanja na evidenciju Zavoda za zapošljavanje u zakonskom roku, zbog čega gube pravo na zdravstvenu zaštitu. Korisnici prava na stalnu novčanu pomoć, civilne žrtve rata, djeca predškolske dobi, žene starije od 60 i muškarci stariji od 65 godina, samohrane majke (trudnice, porodilje do starosti djeteta do godinu dana) uglavnom ostvaruju pravo na zdravstvenu zaštitu putem Javne ustanove „Centar za socijalni rad“ Zavidovići, a pripadnici branilačkih populacija putem Odsjeka za boračka pitanja pri ovoj Službi.

Napominjemo da je oblast zdravstvene zaštite u nadležnosti kantona.

- Na prijedlog Grada Zavidovići, od 2019. godine, a u svrhu zapošljavanja i sticanja kvalifikacija, od strane Ministarstva za obrazovanje, nauku, kulturu i sport ZDK objavljavani su javni pozivi za obrazovanje odraslih (osnovna škola) i doškoloavanje je bilo besplatno.

- Također, Grad Zavidovići u svom Budžetu svake godine planira poseban transfer namijenjen za hitne i vanredne pomoći socijalno-ugroženim licima, čiji korisnici su u velikoj mjeri upravo pripadnici romske populacije (u svrhu liječenja, teške materijalne situacije i sl.). Tačan iznos takve vrste pomoći koji je isplaćen pripadnicima romske populacije ne možemo utvrditi, jer na našim obrascima zahtjeva ne postoji rubrika „nacionalnost“.

4. Vijećnik Samir Skejić: Pitanje broj 4.

Šta je s planovima jesenje sjetve obzirom da smo imali usmeno obećanje Načelnika da će se osigurati sistemski pristup planovima interventne proizvodnje vlastite hrane?

Odgovor na četvrto vijećničko pitanje (Odgovor je sačinjen na osnovu akta Službe za upravu poljoprivrede, vodoprivrede i komunalnih poslova, broj: 08-45-23/22-AP-195 od 24.10.2022. godine): Sa trenutno planiranim sredstvima u Budžetu Grada namijenjenim za razvoj i potrebe poljoprivrede ne mogu se praviti planovi za sistemski pristup u proizvodnji hrane. Dobra volja i namjera je pokazana kroz prvi rebalans kada su sredstva uvećana sa 150.000,00 KM za 60.000,00 KM na 210.000,00 KM. A evo i novim rebalansom je planirano da se obezbijedi dodatnih 25.000,00 KM, što ukupno iznosi 235.000,00 KM. Potrebno je prije svega da poljoprivrednici na vrijeme ostvare podršku sa federalnog, kantonalnog i gradskog nivoa za njihovu proizvodnju, s tim da se na svim nivoima revidiraju vrste proizvodnje i način podsticaja koji treba biti po proizvedenim količinama proizvoda i izuzetno po površinama kultura. Grad Zavidovići je imao u vidu interventnu proizvodnju za male proizvođače i kroz rebalans se opredijelio za podsticaj pojedincima prema njihovim vidovima proizvodnje. Za neki ozbiljniji sistemski pristup proizvodnji hrane potrebno je obezbijediti više sredstva nego što je to do sada bilo u Budžetima do sada.

5. Vijećnik Samir Skejić: Pitanje broj 5.

Šta je sa planovima zasnivanja Zdravstvene komisije za praćenje rada u ustanovama koje brinu o zdravlju osoba s posebnim potrebama?

Odgovor na peto vijećničko pitanje (Odgovor je sačinjen na osnovu akta Službe za upravu društvenih djelatnosti, pitanja boraca i opću upravu, broj: 04-45-15/22-AP-312 od 24.10.2022. godine): „Službi nije poznato da su postojali „planovi“, niti inicijative za zasnivanje Zdravstvene komisije za praćenje rada u ustanovama koje brinu o zdravlju osoba s posebnim potrebama (duševnim smetnjama). Grad Zavidovići nije nadležan za imenovanje navedene komisije.

Napomena: Na području Grada Zavidovići od 2012. godine, u skladu sa Pravilnikom o otkrivanju, ocjenjivanju sposobnosti, razvrstavanju i evidenciji djece i mladih ometenih u fizičkom i psihičkom razvoju („Službene novine Zeničko-dobojskog kantona”, broj: 1/12), postoji prvostepena stručna komisija o otkrivanju, ocjenjivanju sposobnosti, razvrstavanju i evidenciji djece i mladih ometenih u fizičkom ili psihičkom razvoju Općine Zavidovići.

Od JU „Dom zdravlja“ Zavidovići dobili smo informaciju da takva komisija ne postoji pri Domu zdravlja jer nije specijalizirana ustanova za liječenje osoba sa duševnim smetnjama. Odgovor ćemo zatražiti i pismenim putem od navedene javne ustanove, te ga naknadno dostaviti.

Zakon o zaštiti osoba sa duševnim smetnjama („Službene novine FBiH“, broj: 37/01, 40/02,52/11), član 51 propisuje: „Komisije za zaštitu osoba sa duševnim smetnjama ostvaruju se pri zdravstvenim ustanovama specijaliziranim za liječenje osoba sa duševnim smetnjama. Organizaciju i rad propisuje federalni ministar zdravstva. Članom komisije ne može biti osoba koja je zdravstveni radnik u zdravstvenoj ustanovi za koju se osniva komisija. Komisije za zaštitu osoba sa duševnim smetnjama prate provođenje zaštite osoba sa duševnim smetnjama nezavisno od toga da li su dobrovoljno smještene, prisilno zadržane ili prisilno smještene u zdravstvenu ustanovu.“

Pravilnikom o organizaciji i radu Komisije za zaštitu osoba sa duševnim smetnjama („Službene novine FBiH“, broj: 53/01), član 2. propisano je: „Komisija za zaštitu osoba sa duševnim smetnjama (u daljem tekstu: Komisija) osniva se i djeluje u zdravstvenim ustanovama, kao i odjelima zdravstvenih ustanova specijaliziranim za liječenje osoba sa duševnim smetnjama“.

6. Vijećnik Samir Skejić: Pitanje za nadležnu gradsku službu (Pitanje a 4. sjednice Gradskog vijeća Zavidovići):

Obzirom da su četiri vijećnika OV/GV-a u 2021. godini istupili iz članstva u parlamentarnim strankama zanima me kakav je pravni status novčanih sredstava iz parlamentarnog fonda u kojem su trebali participirati i navedeni vijećnici i kako je pravno riješen utrošak ovog dijela sredstava koji po slovu zakona pripada navedenim vijećnicima.

Odgovor na prvo dopunsko vijećničko pitanje (Odgovor je sačinjen na osnovu akta Stručne službe Gradskog vijeća, broj: 01-04-2197/22-AP-2 od 04.10.2022. godine): Političke stranke mogu se finansirati na način kako propisuje član 3. stav (1) tačka e) Zakona o finansiranju političkih stranaka („Službeni glasnik BiH“, broj: 95/12, 41/16), odnosno, politička stranka može da obezbijedi sredstva iz budžeta BiH, entitetskih budžeta, kantonalnih budžeta i budžeta Brčko Distrikta, te budžeta drugih jedinica lokalne uprave i samouprave, u skladu sa entitetskim zakonom.

U članu 7. stav (2) Zakona o finansiranju političkih stranaka propisano je da ukupna sredstva iz stava (1) ovog člana ne mogu prelaziti iznos od 0,2% budžeta BiH u kalendarskoj godini.

U članu 7. stav (3) Zakona o finansiranju političkih stranaka propisan je način raspodjele sredstava budžeta BiH političkim strankama, odnosno koalicijama političkih stranaka, na način da se.

- a. 30% sredstava dijeli jednako svim političkim strankama, odnosno koalicijama političkih stranaka koje su osvojile mandate,
- b. 60% sredstava dijeli prema broju poslaničkih, odnosno delegatskih mandata, koje svaka politička stranka, koalicija političkih stranaka, odnosno nezavisni kandidat ima u trenutku dodjele mandata,
- c. 10% od ukupnog iznosa raspoređuje parlamentarnim grupama srazmjerno broju poslaničkih, odnosno delegatskih mjesta koja pripadaju manje zastupljenom spolu.

Član 7. stav (5) Zakona o finansiranju političkih stranaka propisano je da Parlamentarne grupe, odnosno klubovi poslanika i delegata i nezavisni kandidati u Parlamentarnoj skupštini BiH učestvuju u raspodjeli sredstava iz stava (3) tačka b) ovog člana prema broju poslaničkih, odnosno delegatskih mandata u domovima Parlamentarne skuštine Bosne i Hercegovine.

Član 7. stav (6) Zajednička komisija za administrativne poslove Parlamentarne skupštine BiH će svojim aktima detaljnije regulirati raspodjelu sredstava iz ovog člana, kontrolu trošenja i druga finansijska pitanja u vezi s provođenjem ovog zakona.

Analognim tumačenjem navedenih odredaba Zakona proizilazi da bi detaljan način raspodjele sredstava iz budžeta Općine / Grada, za finansiranje političkih stranaka, odnosno koalicija političkih stranaka i nezavisnih kandidata, odnosno klubova poslanika i delegata, uređuje se aktima Gradskog vijeća.

Općinsko vijeće Zavidovići je na 19. sjednici održanoj dana 02.06.2014. godine donijelo Odluku o kriterijima i načinu finansiranja političkih subjekata zastupljenih u Općinskom vijeću Zavidovići („Službeni glasnik Općine Zavidovići“, broj: 3/14).

Predmetnom odlukom su utvrđeni kriteriji i način finansiranja političkih stranaka, koalicija političkih stranaka i nezavisnih kandidata kao i parlamentarnih grupa, odnosno klubova vijećnika zastupljenih u Općinskom vijeću Zavidovići.

Članom 3. Odluke o kriterijima i načinu finansiranja političkih subjekata zastupljenih u Općinskom vijeću Zavidovići, propisano je da:

„Sredstva planirana Budžetom Općine Zavidovići, raspoređuju se političkim strankama, koalicijama političkih stranaka, nezavisnim vijećnicima te klubovima vijećnika zastupljenim u Općinskom vijeću na način da se:

- 30% sredstava dijeli jednako svim političkim strankama, odnosno koalicijama političkih stranaka koje su osvojile mandate,
- 60% sredstava dijeli prema broju vijećničkih mjesta, koje svaka politička stranka, koalicija političkih stranaka odnosno nezavisnih kandidata ima u trenutku dodjele mandata,
- 10% od ukupnog iznosa raspoređuje parlamentarnim grupama srazmjerno broju vijećničkih mjesta koja pripadaju manje zastupljenom spolu.“

Član 1.9. Izbornog zakona Bosne i Hercegovine („Službeni glasnik BiH“, broj. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20), propisano je:

„(1) Mandat pripada izabranom nosiocu mandata, a ne političkoj stranci, koaliciji ili listi nezavisnih kandidata koja ga je predložila na kandidatskoj listi. Mandat ne može prestati osim u zakonom predviđenim slučajevima.

(2) Ukoliko izabrani nosilac mandata, u toku trajanja mandata, istupi iz političke stranke, koalicije ili liste nezavisnih kandidata koja je učestvovala na izborima i na čijoj je kandidatskoj listi bio izabrani nosilac mandata, postaje samostalni vijećnik / odbornik, odnosno poslanik / zastupnik.“

Vijećnici Općinskog / Gradskog vijeća Zavidovići, koji su u skladu sa članom 1.9. stav 2. Izbornog zakona BiH, istupili iz parlamentarnih stranaka, stekli su status samostalnih vijećnika, a isto nema uticaja na raspodjelu sredstava u skladu sa članom 3. Odluka o kriterijima i načinu finansiranja političkih subjekata zastupljenih u Općinskom vijeću Zavidovići.

Na osnovu člana 3. stav 1. alineja 2. Odluke o kriterijima i načinu finansiranja političkih subjekata zastupljenih u Općinskom vijeću Zavidovići, koja glasi: „- 60% sredstava dijeli prema broju vijećničkih mjesta, koje svaka politička stranka, koalicija političkih stranaka odnosno nezavisnih kandidata ima u trenutku dodjele mandata,“, parlamentarnim strankama se obračunavaju i isplaćuju sredstva prema broju vijećničkih mjesta u trenutku dodjele mandata i

ista se ne umanjuju u slučaju ako izabrani nosilac mandata u toku trajanja mandata istupi iz političke stranke i postane samostalni vijećnik.

Član 3. stav 1. alineja 3. Odluke o kriterijima i načinu finansiranja političkih subjekata zastupljenih u Općinskom vijeću Zavidovići, koja glasi: 10% od ukupnog iznosa raspoređuje parlamentarnim grupama srazmjerno broju vijećničkih mjesta koja pripadaju manje zastupljenom spolu.“, odnosi se na finansiranje Klubova vijećnika.

3. VIJEĆNIČKO PITANJE VIJEĆNIKA ARMINA IMAMOVIĆ:

Vijećnik Armin Imamović: Pozdravljam sve prisutne,

Ovako ja sam se javio za jedno pitanje vezano za ovaj transfer sa Kantona za radnike „Krivaje“, „Krivajine“ radnike. Tu su „Krivajini“ radnici u stečaju i „Krivajini radnici Mobajl. Većinom imaju kritike „Krivajini“ radnici koji su u stečaju prije da ne dobivaju kao ovi što je Mobajl što dobivaju iz Mobajla. Da li može se tu uticat da se svi radnici gledaju isto. Ne da se prave razlike „Krivajinih“ radnika Mobajl i „Krivajinih“ radnika u stečaju koji su prije i da li se može uticat da bi konkretno njima mi pomogli radnicima „Krivaje“ da se uplate vrše za spajanje radnog staža, tim radnicima je preči koji su u stečju u „Krivaji“ pod stečajem važnije da se spaja ovaj radni staž radi penzionog nego te neke sitne pomoći. Hvala.

Odgovor na vijećničko pitanje (Odgovor je sačinjen na osnovu akta Službe za upravu društvenih djelatnosti, pitanja boraca i opću upravu, broj: 04-45-15/22-AP-312 od 24.10.2022. godine): Program socijalno-interventne pomoći bivšim radnicima privrednih društava u stečaju ili postupku likvidacije sa područja Grada Zavidovići koji je pripremio Grad Zavidovići, a na koji je Vlada Zeničko-dobojskog kantona dala saglasnost svojom Odlukom, izrađen je po instrukciji Ministarstva za rad, socijalnu politiku i izbjeglice Zeničko-dobojskog kantona, jer su navedena sredstva namjenska.

- Predmetna sredstva su namjenski odobrena od strane Vlade ZDK, te su socijalno-intervenirajućeg karaktera i svrhu istih nije bilo moguće izmijeniti. Kada je riječ o uvezivanju radnog staža za bivše radnike PD Krivaja – u stečaju, Vlada FBiH je dužna obezbijediti novčana sredstva za uvezivanje radnog staža za one radnike koji ispunjavaju uslove za penzionisanje, što prema našim saznanjima, Vlada FBiH i čini za sve radnike koji su stekli uslove za penzionisanje.

4. VIJEĆNIČKA PITANJA VIJEĆNIKA ŠEMSUDINA SKEJIĆ:

1. Vijećnik Šemsudin Skejić: Pitanje br. 1.5.

Konto 61412217 transfer za muški rukometni klub

Da li će muški rukometni klub u preostalih 7 mjeseci dobiti dodatna sredstva ili će transfer od 100.000 KM ostati ukupan transfer za 2022. godinu kako je i planirano?

U najmanju ruku čudno je da se ukupno predviđeni transfer realizuje 100% u prvih 5 mjeseci budžetske godine.

Odgovor na dopunsko peto (1.5) vijećničko pitanje (Odgovor je sačinjen na osnovu akta Službe za upravu društvenih djelatnosti, pitanja boraca i opću upravu, broj: 04-45-15/22-AP-312 od 24.10.2022. godine): Grad Zavidovići je realizovao sredstva predviđena na Transferu za muški rukometni klub u potpunosti. Sredstva su realizovana avansno po kvartalima zbog vanrednih i neodgodivih troškova Kluba. Ne postoje dodatna planirana sredstva za RK „Krivaja“.

2. Vijećnik Šemsudin Skejić: Vijećničko pitanje br. 3 Kašnjenje u dostavljanju, na dnevni red sjednice vijeća, vijećničkih inicijativa i inicijativa udruženja građana

Članom 109 Poslovnika o radu Općinskog vijeća predviđeno je da vijećničke i građanske inicijative uđu u proceduru rješavanja u roku od 30 dana od datuma podnošenja.

Činjenica je da su ti rokovi mnogo duži.

Nerijetko inicijativa ne uđe u proceduru ni za 120 dana od dana upućivanja.

Analizirajući program rada vijeća koji se nalazi na dnevnom redu 4. sjednice gradskog vijeća, nisam mogao zaključiti koliko vijećničkih, a koliko građanskih inicijativa upućeno, a da još nije dospjelo na dnevni red.

Zbog toga postavljam slijedeća pitanje:

Pitanje prvo:

Koliko vijećničkih i koliko inicijativa udruženja građana još nisu dospjele na dnevni red vijeća, koje su to inicijative i u kom roku možemo očekivati dostavljanje mišljenja o istim.

Dostavljanjem traženih podataka mogli bi smo lakše planirati kako riješiti kršnjenje u radu po ovoj problematici pa ako treba i promijeniti poslovnik na način da rok od 30 dana povećamo na recimo 60 dana, ali da se držimo poslovnika.

Pitanje drugo:

Kada će zaključci o prihvatanju vijećničkih i inicijativa građana ući u proces praktične realizacije. Svjedoci smo da je broj podnešenih inicijativa, u tekoćem mandatu općinskog gradskog vijeća, prevelik. Nastavimo li ovako, na kraju našeg mandata, taj broj će se mjeriti stotinama. Evidentno je da je broj prihvaćenih inicijativa zabrinjavajući mali. Isto tako može se zaključiti da je veliki broj inicijativa opravdano odbijen. Ovdje govorim o inicijativama koje je vijeće prihvatilo i naložilo da se pristupi njihovoj realizaciji. Stiče se utisak da za veliki broj, od ono malo prihvaćenih inicijativa, realizacija nije ni na pomolu.

Praksa je da su u realizaciji zaključci tzv. „trivijalnih“ inicijativa za koje nisu potrebna finansijska sredstva, niti previše utroška radnog vremena onih koji su zaduženi za realizaciju.

Nisam primijetio da je u toku realizacija sveobuhvatnih inicijativa. Najkvalitetniji odgovor na ovo pitanje bio bi: prezentacija plana aktivnosti realizacije zaključaka o prihvatanju vijećničkih i inicijativa udruženja građana.

Odgovor na dopunsko (broj neobrađenih inicijativa) vijećničko pitanje (Odgovor je sačinjen na osnovu akta Stručne službe Gradskog vijeća, broj: 01-04-2197/22-AP-2 od 04.10.2022. godine): U prilogu dopisa dostavljamo tabelarni pregled vijećničkih inicijativa postavljenih od početka mandata vijećnika u Općinskom / Gradskom vijeću Zavidovići, zaključno sa 5. sjednicom Gradskog vijeća Zavidovići održane dana 12.09.2022. godine.

Navedena tabela sadrži podatke o obrađenim i neobrađenim vijećničkim inicijativama.

PRILOG: Tabelarni pregled postavljenih vijećničkih inicijativa od 25.01.2021. godine do 12.09.2022. godine.

Pored tabelarnog pregleda vijećničkih inicijativa postavljenih u periodu od 25.01.2021. godine do 12.09.2022. godine, u prilogu dostavljamo tabelarni pregled vijećničkih inicijativa po kojima je provedena procedure i koje je Općinsko / Gradsko vijeće prihvatilo i utvrdilo određenu obavezu za realizaciju prihvaćenih vijećničkih inicijativa.

PRILOG: Tabelarni pregled prihvaćenih vijećničkih inicijativa od 25.01.2021. godine do 12.09.2022. godine – prilog broj 1.

Također, pored tabelarnog pregleda vijećničkih inicijativa postavljenih u periodu od 25.01.2021. godine do 12.09.2022. godine, u prilogu dostavljamo tabelarni pregled inicijativa podnesenih od udruženja, građana, privrednih subjekata po kojima je provedena procedura i koje je Općinsko / Gradsko vijeće razmatralo, a za one koje je prihvatilo i uputilo u obradu.

PRILOG: Tabelarni pregled razmatranih inicijativa od 25.01.2021. godine do 12.09.2022. godine. – tabelarni pregled broj 2.

U tabelarnom pregledu broj 3. dostavljamo pregled zaprimljenih ostalih inicijativa (udruženja, građana i privrednih subjekata), koje su od Stručne službe Gradskog vijeća proslijeđene u obradu.

PRILOG: Tabelarni pregled neobrađenih - ostalih inicijativa od 25.01.2021. godine do 12.09.2022. godine. – tabelarni pregled broj 3.

Dostavljene preglede dostavljamo na uvid.

S poštovanjem

Dostavljeno:

1. Naslovu,
2. U spis.

GRADONAČELNIK

doc. dr. Hašim Mujanović

Obradio: _____
(Nermin Čahtarević)